

Iwwer die Mauerseechler

Wennde so um die Zeit in de Himmel guckst, doo konnsde se sehe, die Mauerseechler. Ich guck gern nooch dene, obwohl die grad jetzt mich e bissi traurisch mache. Isses doch so, dass grad die Mauerseechler bei de ersde von unserne Summerveechel sinn, die sich widder fort mache. Wenn nochemol drei Woche erum sinn wernn die meisde von dene uffem Weech nooch Süde soi, unn obwohl se erst im nächsde April widerkumme, also länger fort sinn als se hier bei uns in Deutschland bleiwe, sinn die Mauerseechler hier dehoom unn nit in Afrika. Weil hier iss in irchendem Loch innere Gemäuer ihr Nest, hier kriehense ihr Junge unn hier ziehense ihrn Noochwuchs groß.

Als Bub bin ich immer um die Galluskerch erum gemacht, grad geecheiwwer war ich joo dehoom. Unn onn irchendem Daach, so jetzt um die Zeit, habb ich uffem Boddem vorm Torm enn Voochel uffem Boddem sitze seh, der hott geflattert, iss awwer nit e-weckkumme. Gonz vorsichdisch bin ich näher droo, bin in die Knie gonge unn habb merr dess Dier emol genau oogeguckt. Der Voochel – ess war enn Mauerseechler – hott mich mett gonz kalde Aache oogeguckt, hott sein Schnawwel uffgerisse unn hott merr uff die Art unn Weis gedroht, debei wollt ich emm doch gar nix mache.

Ich waaß nit wievill Leit schunnemol so enn Mauerseechler aus de Näh geseh hawwe. Bei dem kann merr nemlich noch gonz genau erkenne, dasserr mett de Eidechse verwondt iss, no ja, so von gonz frieher vor Millione von John. Unn weil ich als Bub schunn Eidechse gefonge unn debei gemerkt hat, wie schnell dene ihrn Schwonz abbricht, habb ich unn dess waaß ich noch gonz genau, so e bissi Ängst vor dem Mauerseechler uffem Boddem gehabt.

Wie ich doo su in de Knie war, alls geguckt unn nix gemacht habb, iss uff oomol moin Kusseng kumme. Was machsden du doo, hotter mich gefroocht, unn ich habb uff den Voochel gezeicht unn gesaat: Der hott bestimmt was, weiler nit fortflieche dut. Doo hott moin Kusseng gelacht, hott den Voochel trotz soim Gezisch uffgehowe, hott merrn noch emol gezeicht unn hotten dann grad in die Luft geworfe – unn so schnell hosde nit geguckt isser hoch unn um de Torm erumgeflooche, fort warer.

Dann hott moin Kusseng mirs erklärt: Dess war noch enn junge Mauerseechler, der iss gonz sicher aussere Nesthöhle owwe im Torm gefalle unn hott noch nit gelernt gehabt, wie merr vom Boddem aus fortflieche kann. Alde Mauerseechler kenne dess, die hipppe e bissi hoch odder klettern grad so e Stick irchend e Mauer enuff unn dann kenne se abflieche, dess iss weilse so lange Flitch hawwe unn die e Stick länger sinn als die von de Schwalwe, die merr joo efter emol vor sooner Pitch sitze unn dann uffflieche sieht.

Ja, dess iss merr alles oigefalle, als ich so in de Himmel geguckt habb. Unn wenn ich dann so guck unn droo denk, dass die Mauerseechler bald widder ab nooch Afrika mache dann werr ich deshalb e bissi traurisch weil ich denk, hoffentlich seh ich die nochemol widder, weil bis zum nächsde Friejhohr isses long unn ich bin joo nimmi de Jingsde. Awwer onnersterum, die wernn noch in hunnert unn in dausend Johr flieche unn dann sinns onnern Mensche, die dene zugucke unn die dann aach denke, werr ich die nochemol ...

Ess iss schunn komisch, was oom monchmol so dorch de Kopp gieht.

Eiern Honnes